

ҰЛТ БОЛМЫСЫ

Республикалық патриоттық, әдебиеттанымдық журнал

№ 5 (30)

Мамыр 2014



Болат
БАЙҚАДАМОВ:
«ІСКЕРЛІГІ
ТАЛАЙҒА ҮЛГІ»

10-БЕТ

Сұлтанәлі БАЛҒАБАЕВ:
«ОЙ БИГІНДЕГІ
АЗАМАТ»

16-БЕТ

Бақытқожа РҮСТЕМОВ –

ХАЛЫҚАРАЛЫҚ
ПУБЛИЦИСТИКАНЫҢ КЛАССИГІ

Дүйсенкүл БОПЫВА,
Оңтүстік Қазақстан облысының
күрметті азаматы, зейнеткер:



«МАҚТАНУҒА ТҰРАРЛЫҚ БОЛМЫСЫ БАР»

Жас келе өткен өмірің көз алдында елестеп тұрады екен. Бірге қызметтес болған достарды, қызметтестерді үнемі еске алып отырып мен өзімді бақытты адамдар қатарына қосамын. Әр заманның ерекше бір атап өтетін жақсылығы мен жамандығы бар. Ал, менің ерекше айтарым, біздің жас кезімізде қоғамда тәртіп пен мәдениет ерекше жоғары болды. Артымыздан келе жатқан ұрпақтарды дұрыс тәрбиелесек, сол ұрпақтарымыз өздерін өкшелеген буынға елімізді, жерімізді қастерлеп, қадірлеуді ұғындырса деген пікірді ұстандық. Қоғамның сан түрлі сатыларынан өтіп, жастармен көптеп жұмыс жүргіздік. Осы күнге дейін жастармен сөйлескім келіп тұрады. Жасым шамалы ұлғайған тұста, облыс әкімінің орныбасары болып қызмет атқардым. Жастарды жұмысқа көптеп тартып жатқан тұсымызда ұйымдастырушылық бөліміне Бақытқожа келді. Бұл бөлімнің ауқымы кең, қарастыратын мәселесі де жоғары болатын. Осы бөлімдегі қызметте бес-алты жас жігіттер қызмет атқарды. Солардың арасында осы Бақытқожа бітім болмысы ерек, дара тұрды. Қанша дегенмен халықпен жұмыс жасағаннан кейін адам танып, психолог та болады екенсің. Қағаздарға қол қойдыруға немесе ақылдасуға, тапсырма алуға алдына келгенде жігерлі, терең ойлы, өзінше алдына қойған мақсаттары бар азамат болып жарқылдап көрінетін. Отбасынан алған тәрбиесінің жақсы екендігін көрсете білді.

Маған ұнайтын бір қасиеті, Бақытқожаға бір тапсырма берсең соңына дейін орындайтыны. Бастықтардың баршасы Бақытқожаны осы тиянақтылығы үшін сыйлап, құрметтейтін. Ол кезде жоғарғы қызметте отырғандардың көбісі орыстар болды. Олар жасыратыны жоқ, әрбір қазақ баласына «Мынаның қолынан не келеді екен» дегендей сыни көзқараспен қарап отыратын тұста, осы Бақытқожа қазақтың қолынан, соның ішінде қазақ жастарының қолынан не келетінін көрсетті.

Адамдық қасиет турасында сөйлеу, үлкен ұлағаттықты талап етеді. Өйткені, адамдық тұрғысында әңгіме айтпас бұрын, өзің де соған лайықты болуың керек. Осы тұста ойыма Жүсіп Баласағұн бабамыздың «Адамда жақсы қасиет болмаса, оған бақ та, бақыт та қонбайды» деген аталы сөзі оралып отыр. Осы тұрғыдан алғанда оны адамдық жақсы қасиетке бай азамат деп санаймын. Оның кез келген адаммен тіл табыса алуы ұжым ішінде абыройлы етіп, өзіне еңбекқорлығымен қоса жарқын болашақ сыйлады.

Тумасак та туғанымдай болған Төлеген ағамыздың тәрбиесін алған ұрпақ екенін өз ортасына, тіпті, қазақ қоғамына Бақытқожа дәлелдей алды.

Мақтануға тұрарлық болмысы бар, қазақтың біртуар ұлымен қызметтес болған сәттерімді қуанышпен еске алып отырамын.

Қызметтестерімен бірге. 1983 жыл. (отырған Дүйсенкүл Бопыва)

